

Sukan staf UMS mampu lahir atlet profesional

Oleh Erdie Ab Wahid

bhvarsiti@bharian.com.my

BH 23.02.2012 16

KOTA KINABALU: Universiti Malaysia Sabah (UMS) melalui pusat sukannya berhasrat menjadikan Sukan Staf UMS sebagai pemangkin pembangunan kecemerlangan sukan dan melahirkan atlet profesional daripada institusi pengajian tinggi (IPT).

Pendaftar UMS, Datuk Abdullah Md Said, berkata program seumpama ini boleh melahirkan lebih ramai atlet dalam kalangan pelajar dan staf mewakili IPT di bidang sukan termasuk peringkat universiti tempatan.

"Pemilihan atlet yang mewakili universiti itu diharap dapat menambah kelahiran ahli sukan bermutu dan mampu menaikkan nama universiti pada masa akan datang," katanya kepada pemberita selepas menutup Program Kemuncak Sukan Staf UMS yang berlangsung selama 22 hari berakhir Isnin lalu.



PROF Kamaruzaman (kanan) melepaskan kakitangan UMS dalam cabaran ke puncak UMS di Kota Kinabalu.

Abdullah yang juga Pengerusi Jawatankuasa Pengelola Kejohanan Sukan Staf UMS ke-12 berkata, program yang dianjurkan sejak 2008 itu dapat mempromosikan budaya hidup sihat dan cergas dalam kalangan warga UMS.

"Sebanyak 19 acara sukan dianjurkan bermula dengan golf pada 21 Januari lalu termasuk tenpin bowling, ping pong, badminton, bola tampar, bola jaring, futsal, tenis, kayak, olahraga dan berakhir dengan Larian Ke Puncak UMS (mendaki bukit)," katanya.

Sementara itu, Pengarah Pusat Sukan UMS, Mohd Asyraf Abdullah, berkata pihak universiti mengambil

berat pembabitan pelajar dalam kegiatan kokurikulum terutama sukan untuk melahirkan modal insan seimbang meliputi perkembangan akademik, fizikal, mental dan rohani.

"Pusat ini akan mewajibkan kakitangan UMS turut serta dalam acara mendaki bukit (UMS) bermula 20 Februari lalu dan menjemput orang awam menyertai senamrobik di Stadium UMS pada setiap petang Rabu," katanya.

Terdahulu, larian cabaran ke puncak UMS dilepaskan oleh Naib Canselor UMS, Prof Datuk Seri Panglima Dr Kamaruzaman Ampon disertai 280 kakitangan universiti itu.



PROF Kamaruzaman (dua dari kanan) memberi kata semangat kepada kakitangan UMS.